



Kamis, 28 Oktober 2021

Ogen: Josua 6:3-5



Begiken Dingen Dalanken



Tepet erpagi-pagi kenca medak i bas tunduh nari mis kita ertoto. Tupung berngi muatta tunduh pe mis kita ertoto. Tupung sura-suranta berkat ku bas ingan si ndauh, si bahan lebe pertoton, muat kita erdahin bage pe muat kita man, ertoto kita lebe. Ertina gedang-gedang wari geluhta lit i bas pertoton. Kai nge sura-suranta i bas ertoto e? Tentuna gelah kita ibereken Tuhan kejuah-juahen ras keselamatan mentasi wari-wari. Tole nari gelah Tuhan nehi sura-suranta umpamana sukses bas dahin, seh sekolah anak, mehuli jabuna man si enggo erjabu, tambahi Tuhan rejeki ras sidebanna. Mehuli kerina si ipindo kita e. Tapi kai si ipindo kita e megati la mis sialoken. Sabap Tuhan erbahan sada perencanaan si terulin asa si ipindo kita.

Josua, tupung ia mimpin bangsa Israel bengket ku Tanah Kanaan, la banci lang arus mentasi kota Jeriho. La ibahan Josua alu gegehna saja, ertoto ia mindo kemenangan man Tuhan naluken bangsa Jeriho e. Ulihna, labo isuruh Tuhan ia erperang ngelawan kalak Jeriho tapi isuruh Tuhan ia patuh ndalanken perencanaan si enggo ibahanNa. Josua ras tentarana arus ngkelilingi kota e sada kali sada wari. Pitu kalak imam, sekalak-sekalak maba terompet erdalan arah lebe peti perpadanen. I bas wari pepituken Josua ras tentarana erdalan engkeleweti kota e pitu kali janah imam-imam ngembus terompet ndai.

Pemindon Josua ijabab Tuhan alu nuruh ia megiken ras ndalanken persuruhanNa. I bas kepatuhen Josua ndalanken persuruhan e, i je ia ndatken kemenangan. Ertoto kepe labo saja nuriken sura-sura pusuh tapi pe megiken ras ndalanken kai si isuruh Tuhan. I bas kepatuhen megiken ras ndalanken persuruhan Tuhan e i je Tuhan erdahin nehi sura-suranta.